



15. Oktober 2024

UKA2024/43

**Namminersornerullutik Oqartussat kommuunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allangortinneqarnera pillugu Inatsisartut inatsisaat**

(Inissianik attartortittakkanik pigisatut inissiangortitsineq, kaaviaartitsinissamut inerteqqut, piffissaq sioqqullugu taarsigassarsianik akiliineq il. il.)

(Ineqarnermut Attaveqaasersuutinullu Naalakkersuisoq)

Siumut sinnerlugu Naalakkersuisut saqqummiussaannut qutsavigaagut.

Siumumiit anguniaraarput innuttaasut amerlanerpaat namminneerlutik ineqalernissaat, pisortanit isumalluuteqarnerup appasinnerpaaffianiinnissaa siunertaralugu.

Aammalu kikkut tamarmik peqqinnartumik inissaqarnissaat, qanoq akissarsiaqartigineq apeqqutaatinnagu.

Nunatsinni inuiaat imminut pilersortut periarfissaminnik illersuissapput, Siumup anguniarpaa ineqariaatsit assigiinngitsut eqqarsaatigalugit aningaasaqarniarnikkut oqimaaqatigiissitsisoqarnissaa, ineqariaatsit qanoq ittuugaluarpataluunniit najugaqarfinni atugarisat toqqissisimanartooqqullugit. Imminut pilersornerunissaq siunertaralugu periarfissanik atuilluarnissaq pingaartillugu.

Tunngaviusumik inuk uani pineqarpoq, taamaattorli inuup illutaarniarnermi periarfissaq atorlugu, atornerlunneqannginnissaalu uani sinaakkusiami qulakkeerneqassasoq Siumumiit ersarissumik naqissuserneqarnissaa kissaatigissavarput.

Naalakkersuisooqatigiit siunnerfigisaat, ukiuni siuliini eqqartorluarneqartartoq maluginiagassaavoq. Taamatut allorialerneq ineqarnermut aaqqissuusseqqinnermi siunertarineqartumut ilaalluinnarpoq, Siumumiillu isumaqarpugut iluarsartuusseqqinnissamik kinguartitseqqissinnaanngitsugut “namminersortunngorsaanissamut periarfissamik” sinaakkusiissagutta.

Pingaarteqarpoq attartortuunermiit piginnittuunermut ikaarsarneq pitsaasumik peqqinnartumillu piginnittuulersumut toqqissisimanartuussasoq, tamanna qulakkeerneqassaaq ini/illu iluarsartuunneratigut.

Pisortat inissiaatai amerlasuutigut aserfallassimaqaat taamatuttaaq illoqarfinni mikinerusuni illuinnaat pisortanit pigineqartut aamma aserfallangaatsiarsimallutik. Massaklutut itsillugit namminersortunngorsarneqassappata piginnittuulersussanut annertuumik nanertuutaalerataannaamat, attartortunut tunineqannginnerini piginnittut iluarsartuussisimanissaat oqinnerullunilu piginnittuulersumut peqqinnarnerungaarpoq.

Sunaluunniimmi piasisinnaanngilarput aserfallareersoq oquttorluunniit, taamatut pisinissaq kialluunniit nakerinngilaa.

Inuit nammineersut nammineerusuttullu kiffaanngissuseqarlutik pitsaasumik ineqarnissaat sinaakkusiuttariaqarpagut pilerinarsarlugillu. Pingaartumik isorliunerusuni illoqarfinnilu minnerusuni sinaakkutit naleqquttuunissaat Siumumiit nuannaarutigaarput.



Pisariaqarpat pisariaqartitsisut attartortuuginnarusuttut soorunami periarfissaqarnissaat puigorneqassanngillat, taammaattoq pisariaqartitsisut inissaqartinneqassapput.

Aserfallatsaaliinermut kinguaattooraluttuinnarnerput mumiserianngikkutsigu kinguaattooraluttuinnassaagut, qangalili una pisimasartiaqaraluarpoq inuiaqatigiit peqqinnartumik ineqarnikkut/illoqarnikkut atugassaqartinneqatigut, taamaaliunngikkutta ajornerpaajuguni najugaqarfigineqarsinnaajunnaarsinnaanerata pinngitsoortittariaqarparput. Taamaattumik kinguaattoorutit matussuserneqarnissaat maannangaaq iliuuseqarfigisariaqarparput.

Aningaasalersuinissamut tunngatillugu Real Kredit-imik attartornissamut periarfissaqarfiunngitsuni isorliunerusuni, pisortanit 50% angullugu qularnaveeqqusiinissamik annertussusiliineq Siumumiit iluarisimaarparput. Isorliunerusuniittortagut pitsaasumik artukkiinngitsumik periarfissaqaqqullugit. Aammattaq m2-mut minnerpaaffiliunneqartoq 7000kr tunngaviatigut iluarisimaarparput, sumi najugaqarneq aallaavigalugu nalilersuinikkut.

Taamatuttaq nalikilliliisarnermut pisinermi procentinik 20-niit 30-nut qaffaaneq nalikilliliinissamik missingiunneqartoq iluarisimaarlutigu.

Isumaqarpugulli partiit allat qanoq siunnerfeqarnerat naaperiassallugit tusassallugit pingaaruteqartoq. Namminersorlutik oqartussat kommunellu imaattumik periarfissaqalernissaat kiffaanngissusermik annertuumik inuiaqatigiinnut pingaartumillu isorliunerusuni oqilisaasusaaq isumaqatigaarput.

Naggataatigut oqaatigerusuppara Ilaqaratta namminneerlutik aningaasalersukkaminik ikaarsaareersimasunik, taakkuali tulluusimaarutigingaarpagut, nammineq piginnittuulersimanermikkut namminneq ineqarlutik illoqalersimammata, tassunga ingerlasariaqarparput.

Eqqaanngitsoorusunngilara nammineerluni illuliortarneq aningaasalersueriaaserlu 95/5 atorlugu nammineq sanaqateqarluniluunniit sanaartorsinnaaneq aallartisaruttulermat. Taassumattaq qulakkiissavaa nammineq illumik pigisaqalernerneq.

Siumumiit taamak oqaaseqarluta sanaartornermut ataatsimiititaliamut ingerlateqqipparput.

Lars Poulsen, Siumut